

Distincziun da bio per la Bieraria

Il Premi Bio Grischun 2019 va a la Bieraria da Tschlin

■ (anr/ac) A la radunanza generala da Bio Grischun a Landquart ha il manader da fatschenta da la Bieraria da Tschlin Reto Rauch dastgà surpigliar il Premi Bio Grischun 2019. Ina distincziun surdada da l'organisaziun dals purs da bio grischuns ad interpresas ed instituziuns engaschadas a favur da la produczion ecologica.

Pertge è la radunanza da Bio Grischun pli frequenta che la radunanza da l'Uniu purila grischuna? Cler, pervia da la preschientscha dal cabarettist *Flurin Caviezel* la gievgia passada a Landquart. Sia preschentaziun dals nominads per il Premi Bio Grischun 2019 e la resumaziun da la lavur da la suprastanza e gestiun da Bio Grischun è stada ordvart divertenta. E la distincziun surdada da l'organisaziun dals purs grischuns da bio è ida a la Bieraria da Tschlin. Ina bieraria ch'ha dapi sia fundaziun l'onn 2004 gi da batter cun diverssas malempernaivladads. Realisar l'idea naschida entaifer ina lavuratori ch'è sa fatschentà cun opziuns economicas per il futur da la vischnanca da Tschlin è sulet stà in emprim pass. Manar l'interpresa en la zona da gudogn e segirar uschia plazzas da lavur en ina regiun periferica ha duvrà bler engaschi e perseveranza davart da l'acziunari e da la populaziun da Tschlin e pli tard da la vischnanca da Valsot. Il Premi Bio Grischun 2019 surdà la gievgia passada a Landquart n'è betg sulet ina renconuschientscha per la Bieraria Tschlin SA e ses manader da fatschenta *Reto Rauch*, mabain era per l'entira regiun ch'ha sustegnì l'idea e l'interpresa. Cun augmentar il chapital d'acziun, engaschar in gestiunari e dischlocar il lieu da produczion da Tschlin a Martina èsi reussì a la bieraria dad augmentar considerablamain la produczion. Ed era grazia ad ina consequenta produczion cun



La Bieraria Engiadinaisa a Tschlin è vegnida onurada cun il Premi Bio Grischun.

MAD

materia prima da derivanza regionala ed ecologica. Il dumiech e furment derivan da l'Engiadina Bassa e da la Muntogna. Ina tradiziun da biera na posseda l'Engiadina Bassa nagina, tant pli valeva quella regiun pli baud sco garner dal chantun Grischun. Ed il pli novissim product da la Bieraria da Tschlin è ina biera cun stailalva alpina derivanta dal Puschlav.

Laudatio dal purtader dal premi 2018

Gist per quella consequenta strategia da resguardar la produczion ecologica indigena ha la Bieraria da Tschlin retschavi la gievgia passada a Landquart il Premi Bio Grischun 2019. Quai ha il purtader dal Premi Bio Grischun 2018, *Reto Raselli*, accentuà en sia laudatio a chaschun da la surdada a Landquart. El ha valità las stentas da la Bieraria da Tschlin sco exemplaric.

Il manader da fatschenta da la Bieraria da Tschlin, Reto Rauch, ha engrazià a la giuria per il premi ch'el ha valità sco engraziament e renconuschientscha betg sulet per la bieraria e ses emploiads, mabain era per ils producents da la materia prima che serve a la produczion da biera. Rauch ha appellà als preschents da s'annunziar sch'els sajan pronts da furnir graun a la bieraria. Ed el ha annunzià

emprimas emprovas cun virtit indigena e la finamira da cultivar quella en il Grischun. Stada nominada per il Premi Bio Grischun 2019 è sper la Bieraria da Tschlin l'interpresa giuvna Alpenpionier che sa deditgescha dapi intgins onns a la cultivaziun da choven. Da las nuschs da choven producescha Alpenpionier diverssas mangiativas e quai medemamain tenor las premissas da Bio-Suisse. Medemamain nominada per il Premi Bio Grischun è stada ina gruppa da puras e purs dal Partenz activs en la vendita directa dapi 30 onns. Els èn sa fatschentads cun la produczion ecologica e drizzada al bainstar da l'animal dal temp nua che l'agricultura ecologica n'era betg fitg derasada en il chantun Grischun. Avant la surdada dal Premi Bio Grischun en puras e purs da bio sa radunads a Landquart a la radunanza generala. Il president da Bio Grischun *Claudio Gregori* ha manà la radunanza tras las fatschentas statutari-cas ed el vegn er a timunar l'organisaziun dals purs da bio grischuns ils proxims onns. La radunanza generala ha reelegi Gregori per ina proxima perioda d'uffizi e medemamain l'ulteriura suprastanza da Bio Grischun che sa cumpona dad *Ursula Babst Brunner*, *Romana Nicca*, *Fadri Riatsch*, *Christian Bosshard* e *Gion Franzestg Schaniel*. Gregori ha regurdà en sia introduczion a la necessitad da l'agricultura ed en spezial a l'agricultura ecologica da sa drizzar als basegns dal consumment. Sche quai na succedia betg surpiglian ils consuments l'iniziativa politica e sforzian uschia l'agricultura sulet da reagiar. El ha ludà la collavuraziun entaifer la suprastanza da Bio Grischun ed il sustegn da la gestiunaria *Bernadette Arpagaus*. Gregori è da l'avis che l'agricultura da bio saja sin buna via e punctuà la necessitad da chaminar vinavant.